

編號 1 號

【上場】徐佳妤原作

「防守、防守、防守……大火鑊來哩啲！」「三分線，咻！擲入去哩，好球，哈哈，當慶！」佢盡享受看籃球比賽，因為做得放勢牯嘶喉喊，所有个煩惱一瞞目都會毋見忒。

記得小學四年生，該時節林書豪帶領紐約尼克隊連連續續得著好成績，全世界都為佢發癲。因為昇遷著這陣旋風，五年生个佢決定去考籃球體育班。恁好運，分佢考著咧，無想著嘎係辛苦个開始。逐朝晨七點半到學校訓練兩點鐘，放學後，還愛過練點半鐘，練忒，全班愛在教室寫忒作業正做得轉去。最尾練到每一個人，走運動坪十過圈都係小可事情。該載有同學做伴，還有自家對籃球个熱情，佢正毋識喊瘡。

見係有比賽，爺哀總會當無閒：愛準備食个、又愛翕相、錄影、愛做啦啦隊，三不二時還愛駛車仔載佢兜去比賽，屋下人个支持就係球員最大个力量。爺哀看著佢在球場項有好表現，都會緊拍手；係球仔分人抓走¹咧，都當緊張，會在脣項安慰講：「毋怕，再過來。」一場比賽下來，大家都走到氣勃氣鼓又汗流脈

落，愛目珠跔等球仔、接好球仔、擲入籃框肚，若係打毋好，中場休息時會分教練咄：「你兜愛保護球仔，莫慇慇分人抄啊，愛走位擋人……。」大家緊掙汗緊淋水，凝神恬恬聽，大氣都毋敢啟。

打球仔，手腳難免會受傷，有時節無堵好，腳膝頭撞著、腳偏著、腳盤分人蹬著，臃血、烏青、勾筋係已平常个。佢毋驚看醫生做復健，就驚忒傷重抑係功課無寫忒，教練就毋分佢上場，淨做得坐凳板，該時節心肚个毋甘願比訓練還較苦咧。

小學个籃球生活，害佢無時間上網搞遊戲，毋單淨功課進步咧，身體變到當砸，乜學習著仰仔同人合作，正經體會著這句話：「贏球莫沙鼻，輸球莫失志。」在球場無論輸贏，都係佢成長个養分。

¹抓走：音sa' zeu'；此指「抄球」，球賽時從對方球員的側面或背面搶球。

編號 2 號

【姐婆个菜園教室】李秀鳳原作

放暑假也，阿爸、阿姆送侄膠老妹轉到滿舅屋下，同姐婆共下戴兩隻月，毋使去安親班吹冷氣關歸日仔，係兩姊妹最暢樂个事情。其實，侄兜去莊下也愛去上課，無共樣个係，毋使讀書，逐日朝晨跔等姐婆先生去菜園教室，認識各種青菜。

姐婆在菜園搭一隻菜瓜棚，棚頂一蕊一蕊个黃花生到榮榮，侄膠老妹算通棚有幾多蕊？做得打幾多條菜瓜？姐婆笑弛弛仔講：「莫算啦！有兜係公花，毋會打子。」原來菜瓜花同油桐花共樣，有公也有嫲。

侄發現姐婆个菜園，分黃色个花號¹到淦淦，除忒菜瓜以外，像瓠仔、苦瓜、笏瓜、番瓜、長豆仔開个花都係黃色个。「這位有開紫色个花。」老妹看等一頭枝莖係深紫色个，毋知麼个菜，喊到大嫲牯聲。姐婆講這安到吊菜仔，若係吊菜仔開黃花，該就反種²哩，故所吊菜色个吊菜仔，定著係開吊菜色个花。

日頭恁烈，侄膠老妹坐在菜瓜棚下奈涼，看姐婆改菜廂。老妹看生到像手指公恁長个菜瓜子掛等一蕊黃花，還得人惜，就用

拈食指去揆，菜瓜子連等花緊顫，實在還生趣，侄也跔等搞。姐婆看兩姊妹恬索索，行兼來看。「唉哦！你兩儕仰會手恁賤，毋知菜瓜子當瓜鬼³係無？花膠子分人摸過就會消忒。」分姐婆咄，兩姊妹著下驚毋敢出聲。麼个係瓜鬼啊？兩個細姪仔恁毋解。姐婆看出侄兩儕心肝肚个疑狐講：「過加幾日你兜就知！」

過無幾多日，分侄同老妹揆過个細菜瓜仔緊來緊烏，續等連子帶花燥忒乾淨淨，原來這就係瓜鬼。姐婆講：「細人仔愛較有量兜仔，毋好動啊著就羊噉⁴像瓜鬼樣仔得人惱，知無？」侄膠老妹緊領頭緊應：「知咧！」

侄膠老妹最好跔等姐婆去菜園教室，毋單淨做得認識各種青菜，還做得了解佢兜成長个特性，比上自然課還較有意思。

¹號：音 ho；霸佔。

²反種：音 fan` zung`；變種，指事情反常。

³瓜鬼：音 gua` gui`；指小氣、摸不得。

⁴羊噉：音 iong` ve`；嬌慣，動輒大叫。

編號 3 號

【吾个飯筍仔】鄒瑞梅原作

對出世到這下，阿婆一等惜侄，驚侄熱、驚侄寒、驚侄三餐無正常。

同學个飯筍仔大部分係做阿姆準備个，吾个飯筍仔係阿婆親手做个。逐日當晝食飯个時節，就像開獎共樣，吾飯筍仔特別香，裡背有魚有肉有青菜，還有阿婆惜花連盆，惜子連孫，惜侄惜入心个親情。坐在吾邊脣个阿明牯、阿秀撈阿華目盯盯仔緊看吾个飯筍仔，口涎水強強就會流出來哩！侄詐意講飯筍仔打毋開，佢兜比侄還較緊張，儕儕相爭愛撈侄搵手，實在還生趣！等侄打開飯筍仔，歸間教室都鼻得著阿婆个好手藝，阿明牯揣講一定係炆爌肉，正經分佢揣著哩！侄兜感情當好，還會交換菜食，佢食吾个爌肉，侄食厥个煙腸，食到飽飽仔。

阿婆个好手藝，仰般講都毋會漏氣¹，佢煎个黃魚兩片赤赤毋會臭火爌。侄最好食阿婆燂个炒肉，堵著敬神拜祖个時節，阿婆會準備雞鴨、魷魚仔、豬肉料、豆腐乾湊牲敬祖。該暗晡个桌頂，定著會有鹹香鹹香个炒肉，阿婆會特別吩咐阿姆愛加煮兩确

米哦！

阿婆同阿姆在灶下無閒泊杈，阿姆撈魷魚仔、豬肉料、豆腐乾，還有自家菜園摘个蔥仔、蒜仔、芹菜、辣椒仔，通棚切好勢就準備換阿婆炒菜哩！阿婆兩下手就炒出客家好味緒。桌頂有雞盤、快菜炒豬旺仔、薤菜、鹹菜湯，還有侄最好食个炒肉。阿公、阿爸、阿姆緊食緊阿腦阿婆个手路菜，好食到舌嬾就會吞落去，炒肉實在當扯飯哦！侄撈阿哥連食兩碗飯，食到飯甌都見底哩，桌頂个菜分侄兜掃淨淨，侄撈阿哥食到肚圓圓仔，阿婆看著嘎好笑。

食飯个時節，阿婆將侄撈阿哥个飯筍仔裝到淊淊，阿婆自家个碗肚淨有菜味攪飯²。

食等阿婆親手做个飯筍仔，就想著阿婆在灶下汗流脈落个身影。侄愛煞猛讀書，做一個有用个人，等侄大咁，一定愛報答阿婆个恩情。阿婆畜侄大，侄定著會有孝阿婆到老。

¹漏氣：音 lau kui；閩南語借詞。比喻行為表現令人失望。

²攪飯：音 giau' fan；拌飯。